

# Ina nova taglia sin l'energia?

## L'iniziativa da la pvl ha nagina schanza

DA LUCAS DEPLAZES / ANR

■ **Ier ha il cussegl naziunal manà ina intensiva debatta davart la proposta da la Partida verd-liberala (pvl). La partida ha gi nagin sustegn da las ulteriuras partidas politicas.** Il 17 da december 2012 ha la pvl inoltrà ina iniziativa dal pievel che pretenda da remplazzar l'actuala taglia sin la plivalur cun ina nova taglia sin l'energia. Concret muntass quai ina nova taglia sin products energetics sco benzin, gas natural, cotgla ed uran. Il cussegl federal renconuscha bain l'idea d'ina taglia ecologica per cuntanscher la reducziun necessaria dal CO<sub>2</sub> e per reducir il diever d'energia insumma. Malgrà questa visium comunabla na va l'iniziativa betg a prà cun ils plans da la regenza. Il cussegl federal fa plinavant attent che la nova taglia purtass ina chargia supplementara per chasadas cun entradas modestas e per las interpresas. Er il cussegl dals chantuns recumonda al pievel da refusar l'iniziativa. El ha er vult savair nagut d'ina cuntraproposta.

### Ina via privlusa

Ier ha il cussegl naziunal manà ina discussiun davart la midada da paradigma. En la debatta d'entrada ha il pledader da la cumissiun, *Karl Vogler* (csp/OW), fatg attent a la gronda midada da l'iniziativa che savess periclitlar la finanziaziun da las ovras socialas e muntass er ina chargia supplementara per las interpresas e per las chasadas cun entradas modestas. Vegniss l'iniziativa acceptada stuess il pretsch per benzin vegnir augmentà sin trais francs il liter e la tariffa per l'electricitad auzada per 30 raps l'ura kilowatt. La cumissiun propona perquai cun 22 cunter duas vuschs ed ina abstenziun da refusar l'iniziativa e da desister d'ina cuntraproposta.

*Martin Bäumle* (pvl/ZH) fa attent che sia partida saja la suletta cun ina proposta concreta per garantir la midada dal diever da l'energia planisada per 2050. Sco la pratica dals ultims onns demussia vegnia la reducziun dal diever d'energia il-

lusoric en vista a l'augment da la populaziun. Ord quest motiv saja necessari da prender ad uras las mesiras adequatas per garantir la reducziun prendida en mira. L'iniziativa saja en concordanza cun ils basegns da l'economia e garanteschia er la finanziaziun da las ovras socialas. Cun l'iniziativa en discussiun pajan interpresas e singulas persunas che dovran blier energia era dapli taglias. Il cussegl federal ed il parlament han decidì da bandunar l'energia atomara fin l'onn 2050. L'iniziativa da la pvl saja in concept ecologic per cuntanscher questa finamira, fan attent divers represchentants da la pvl. Cun ses cumportament po il singul burgais e pon las interpresas influenzer lur diever d'energia. Per cusseglier naziunal *Josias Gasser* (pvl/GR) èsi temp per in nov sistem che garantescha la midada sin il sector da l'energia. Temp d'emetter in nov signal.

### Effects negativs per las muntognas

Las partidas burgaisas refusan unisono la proposta e fan attent a las consequenzas negativas da l'iniziativa. L'actuala taglia sin la plivalur munta cun la summa da 22–23 milliardas francs l'onn in terz da las entradas da la confederaziun. Ella è la funtauna la pli impurtanta e la pli gista per segirar las expensas da la confederaziun. L'iniziativa savess periclitlar posts da lavur e procurar per turbulenzas economicas. Ella muntia ina aventura finanziaia, accentueschan divers pledaders. Cusseglieier naziunal *Martin Candinas*, (pcd/GR), fa attent als effects negativs per las regiuns muntagnardas. Il pli fitg pertutgads fissan la classa mesauna, la hotellaria, ils indrizs turistics e las famiglias. Er la taglia reducida per la hotellariai e per las mangiativas vegniss dismesa. En mitga cas avess l'iniziativa in augment massiv dals pretschs d'energia. La Partida socialdemocratica (pss) vesa in privel per la finanziaziun da las ovras socialas. La debatta vegn manada a fin gievgia proxima. L'iniziativa na vegn ad avair nagina schanza. La Partida verd-liberala è stada ier totalmain isolada.



En num dal cussegl federal ha recumandà Doris Leuthard da refusar l'iniziativa. KEYSTONE